

B V L L E no. 3
DE N. S. PERELE

PAPE CLEMENT VIII.

C O N T E N A N T

Les Facultez donnees à Monseigneur L'Il-
lustrissime & Reuerendissime Cardinal
de Plaisance, Legat Apostolique
au Royaume de France.



A P A R I S,


Chez Robert NIVELLE, rue S. Iaques,
aux Cigognes.

Et Rolin THIERRY, rue S. Iaques,
au Lis blanc.

Imprimeur de la sainte Vnion.

M. D. X C I I.

AVEC PRIVILEGE,





B V L L E
DE N. S. PERE LE
PAPE CLEMENT VIII.

*Contenant les Facultez donnees à Monseigneur
l'Illustriſſime & Reuerendiſſime Cardinal
de Plaiſance, Legat Apoſtolique au
Royaume de France.*



LEMENT Eueſque Ser-
uiteur des ſeruiteurs de
Dieu, à noſtre tres-cher
ſils Philippes Cardinal
Preſtre du tiltre de ſainct
Onuphre, appellé le Car-
dinal de Plaiſance, Noſtre Legat Lateral
& du S. Siege Apoſtolique au Royaume
de France, Salut & Apoſtolique benedi-
ction. IL eſt bien conuenable que le
ſouuerain Pontife de Rome fauorite am-
plement de priuileges Apoſtoliques, en
tant que le requiert la cōdition des lieux

& du temps, les Legats du S. Siege Apostolique, & ceux-là notamment, qui sont destinez & enuoyez d'aupres de soy, és principaux Royaumes de la Republique Chrestienne, & Prouinces qui en dependent, à fin que par le moyen d'iceux ils puissent durant l'exercice de leur charge, liberalement faire part de la benignité du mesme S. Siege, aux fideles & bien affectionnez à iceluy, selon qu'il en sera de besoing. Et partât comme ainsi soit que pour certaines raisonnables causes à ce nous mouuans, du conseil de noz venerables freres les Cardinaux de la S. Eglise Romaine, Nous vous ayons ce iourd'huy de Nostre autorité Apostolique, constitué & député nostre Legat Lateral, & du S. Siege Apostolique, au Royaume de France, ses Prouinces, Seigneuries, Duchez, Citez, & lieux subiects audict Royaume, & tous autres endroiets, où il vous conuiendra passer à l'occasion de ceste presente Legation; & ce pour y traiter affaires tres-importans à la paix, cōcorde & tranquillité dudiect Royaume, & principalement pour la conseruation de la Religion Catholique en iceluy; selon que plus à plain il est contenu en noz Let-

tres sur ce expedies: Nous, à ce que par
vostre moyé soit pourueu au salut & estat
des personnes & places dudit Royaume,
auons pareillement voulu accompagner
la charge de ceste vostre Legation, de spe-
ciales Facultez, à fin que selon la pruden-
ce qu'il a pleu à Dieu vous despartir, vous
en vsiez modestement & considerémēt,
à la gloire de Dieu, soulagement & edifi-
cation du peuple, & dignité du S. Siege,
ainsi que iugerez estre expediēt en nostre
Seigneur. Parquoy, à fin que puissiez
plus efficacement entendre & vacquer à
l'office de ceste Legation, & vous rendre
vtile, fauorable, & bening enuers les per-
sonnes de merite, qui vous seront agrea-
bles, & bien affectionnees au S. Siege, de
la mesme authorité Apostolique, par la
teneur des presentes, Nous donnons &
oütroys pleine & libre Faculté à vostre
bonne Discretion & Prudence, de visiter,
ou faire visiter, de l'autorité Apostoliq̃,
par vn ou plusieurs autres gens de bien &
capables, selon les sacrez Canons & De-
crez du S. Concile general de Trente,
toutes & quantesfois que bon vous sem-
blera, toutes Eglises Primatiales, Metro-
politaines, & autres Cathedrales, Colle-

giales & Parrochiales; comme aussi les Monasteres tant d'hommes que de femmes; les Prieurez, Preuostez, & lieux Se- culiers, & les Reguliers de l'ordre de S. Benoist, Clugny, Cisteaux, Premonstré, Grandmont, Fontevraud, & de tous autres Ordres, voire mesme des Mendians, & de toutes autres Institutions & Congregations Regulieres: Comme aussi les Hospitaux, quoy qu'ils soient exempts, & immediatement subiects audit S. Siege, ou doüez d'autre priuilege quelconque, ensemble leurs Chapitres, Conuëts, Vni- uersitez, Colleges, & personnes tant Se- culierer que Regulieres, quoy qu'elles soient exemptes & subiectes comme dict est: les corriger & reformer tant au Chef qu'aux membres, les restablir & remettre en leur premier estat, forme, reigle, insti- tution, maniere de vie, discipline & ob- seruance Reguliere, & autrement sur le tout pouruoir & ordonner. Et en outre, changer, corriger, amender, reuoquer & renouveler, voire mesme establir & intro- duire de nouveau, selõ que l'occasion & la qualite des affaires le requerra, toutes Constitutions, Vsances, Coustumes, & autres choses quelconques, que vous co-

gnoistrez auoir besoing de changement, correction, amendement, reuocation, nouuelle introduction & establisement; & mesme de promulguer & confirmer ce qui desia auroit esté estably, & le faire mettre à deuë execution, pourueu qu'il n'y ait rien qui repugne aux sacrez Canōs & Decrets du Concile de Trente.

O S T E R & abroger toutes sortes d'abus, mauuaises vsances, & Coustumes.

E N Q U E R I R soigneusement, corriger, amender, chastier & punir les personnes mal viuantes, dissoluës & desuoyees de leur reigle & Institution ou autrement delinquantes en quelque façon que ce puisse estre, tant Seculieres que Regulieres, voire de l'ordre des Mendians, & en quelque sorte que ce soit exemptes & priuilegees, ou reuoquer icelles à vne deuë & honneste maniere de viure, selon que la Iustice vous y induira, & que la raison vous le pourra dicter, faisant obseruer pour iamais tout ce que pour ce regard vous aurez statué & ordonné.

I N F O R M E R pareillement, & proceder par voye d'accusation, ou denōciation, voire d'office sommairement, simplement, & de plain, sans longue conten-

tion & figure de procez, contre les desobeyssans, faulxaires, vsuriers, rauisseurs, & autres criminels & mal-faïcteurs quelconques, voire fussent-ils exempts, leurs fauteurs & recelateurs de quelque dignité, ordre & cōdition qu'ils puissent estre: & de punir les coupables selon que les Canoniques Sanctions le requierent, & vous le iugerez estre expedient.

O V Y R en outre, cognoistre & mettre à deuë fin, comme il sera requis de droict, les causes des crimes sus-mentionnez, & autres quelconques, tant Criminelles que Ciuiles, Matrimoniales & Beneficiales, pures & mixtes, Ecclesiastiques & profanes, ou autrement appartenantes en quelque maniere que ce soit à la Iurisdiction Ecclesiastique, fors qu'en premiere instance, si ce n'est par appellation de quelque grief irreparable, ou de sentence qui tienne lieu de definitiue, tāt par voye de recours, ou simple complainte, qu'en vertu de quelconques appellations qui sont desia ou pourront estre interiettees pendant ladicte Legation de tous Iuges Ordinaires & des Deleguez, mesme de la part dudit S. Siege: cognoistre de celles aussi qui autremēt, en quel-
que

que sorte que soit, sont ja deuoluës ou le
feront cy apres, & qui sont meuës ou à
mouuoir, avec tous leurs incidents & de-
pendances qui en prouiendroient ou se-
roient annexes, voire sommairement,
simplement & hors le parquet, sans bruit
& sans forme & figure de procez, ayant
seulemēt esgard à la verité du faict, & ob-
seruāt, voire tout d'une venue, les forma-
litez & termes substantiaux, ou bien au
lieu d'iceux, presigeāt certain terme, ainsi
que bon vous semblera.

Et pour effectuer ce que dessus, & au-
tres choses qui pourroient suruenir, citer
& admōnester tous ceux qu'il sera de be-
soing, mesme par Edict & cry public,
pourueu qu'au prealable il apparaisse, voi-
re sommairement & hors iugemēt, qu'on
ne peut auoir seur accez par deuers eux, &
faire inhibitions & defenses à eux, & à
tous Iuges, & autres personnes quelcon-
ques selon & quantes fois qu'il en sera de
besoing, par semblable Edict, & par Cen-
sures Ecclesiastiques, & autres peines, qui
seront taxees, imposees, moderees, & ap-
pliquees à vostre arbitre & volonté, ou de
ceux que vous aurez deleguez: Et proce-
der & executer à l'encontre d'iceux & au-

tres comme il sera de besoing, & agrauer, voire par plusieurs fois, les Censures & peines susdites, contre les mesmes, & autres des-obeyssans, coutumaces & rebelles: mettre & oster l'Interdict Ecclesiastique, & appeller à secours le bras seculier.

SEMBLABLEMENT deputer & cōmettre vne ou plusieurs personnes capables, & constituees en dignité Ecclesiastique, pour cognoistre deldictes causes, & les decider en la forme & maniere cy dessus touchee & avec semblable pouuoir ou limité.

RESTITVER toutes personnes contre toutes sentēces, iugemens & cōtracts, comme la raison & le droict le requeront.

DISPENSER & relascher, avec cause, toutes sortes de serments à l'effect seulement de pouuoir agir.

ABSOVDRE toutes personnes de toutes Censures & peines simplement, ou pour plus grāde seureté, moyennāt qu'ils ayent au prealable deuēment satisfaiēt comme ils doiuent, & est requis de droict, tant aux parties qu'aux Iuges.

ABSOVDRE aussi en l'yne & l'autre Court, tous ceux qui auront recours à

vous, ayans commis homicide, voire volontaire, sacrilege, simonie & pariure, en quelque maniere que ce soit; qui auront fuiuy la guerre, mis violétemēt les mains sur la personne des Clercs & Prestres, pourueu qu'ils ne soiēt Euesques ou Prelats superieurs, & que ce ne soit en faueur de l'heresie, ou des heretiques: ceux aussi qui n'auront recité les heures Canoniales y estant obligez, à raison des Benefices Ecclesiastiques par eux possédez, ou qui ne se seront faicts promouuoir és saincts Ordres, dans le temps prefix de droict, ou biē requis par la fondation, ou autrement. Et ceux qui se serōt faits promouuoir és Ordres sacrez auant l'aage legitime, sans dispēse Apostolique, ou sans Lettres dimissoires de leur Ordinaire, ou qui se seront faicts promouuoir hors le temps ordonné de droict, ou qui auront pris quelque Ordre superieur auparauant qu'auoir receu celui qui le deuoit preceder, ou qui autrement en quelque maniere que ce soit se trouuerōt mal promeuz: Ceux aussi qui auront detenu des Benefices Ecclesiastiques incompatibles, voire cōtre la Constitution du Pape d'heureuse memoire Iean 22. Nostre predecesseur,

qui se commence **EXECRABILIS**, ou par quelque autre façon indeuë. Encore que ceux cy & autres quelconques ayent pour autres causes & en quelque maniere que ce soit indeuëment prins les fruits & reuenuz Ecclesiastiques.

ABSOLVDRE ceux qui auront cōmis adultere, inceste, fornication, & autre peché de la chair quelconque, pareillement les faulxaires des Lettres & Supplicatiōs Apostoliques, vsuriers, rauisseurs & pillars, bouteveux & autres coupables de tous crimes appartenans à la Cour Ecclesiastique, tant Clercs que Laiz, fils vous en font humble requeste.

A SÇA VOIR, en suspendant du ministère de l'Autel les homicides volontaires & Clercs symoniaques en la receptiō des saincts Ordres, pour tout iamais.

ET les promeuz avant l'aage legitime, de l'executiō & exercice de leurs Ordres, pour autant de tēps qu'il s'en falloit qu'ils n'eussent atteint l'aage legitime, lorsqu'ils furent promeuz, & pour d'auantage encore selon que l'arbitrerez.

ET quant aux autres qui auront perpetré le crime de symonie touchant les Benefices, apres qu'ils les auront quittez.

realement & de faict.

ET ceux qui auront detenu lesdits Benefices contre ladicte Constitution EXECRABILIS, ou par quelque autre indeuë maniere, apres que pareillemēt ils les auront delaissez.

ET ceux qui auront recueilly & prins indeuëment les fruiçts & reuenuz Ecclesiastiques, à la charge de les faire restituer, selon les facultez & moyens des impetrās & ainsi que l'arbitrerez aux Eglises & lieux d'où ils sont procedez, ou d'estre distribuez aux pauvres, ou mesme les quittant & remettant du tout, ou en partie aux susdicts impetrans.

ET quant aux vsuriers, ayant au prealable fait vne deuë restitution des vlures, & les Bousefeux & Rauisseurs apres qu'ils auront deuëment satisfaiçt au dommage par eux commis, & apres auoir enjoinçt à chacun d'eux & à tous autres vne penitēce salutaire, & toutes autres choses qui eniointes leur deurent estre.

OCTROYER dispense à tous & chascuns les sus-mentionnez, sur l'irregularité par eux contractee à l'occasion des crimes cy deuant declarez, ou en quelque autre maniere que ce soit, (excepté tou-

tesfois celle qui procede d'homicide volontaire, symonie réelle, bigamie, ou pour estre illegitime & bastard) encore mesme qu'ils se soient meslez du diuin seruice (nō toutesfois au mespris des Clefs de l'Eglise) estant liez par lesdictes sentences, censures, & peines: Et que nonobstant la dictē irregularité, si autre empeschement Canonique ny resiste, ils puissent estre promotez à tous les Ordres sacrez, & mesmes à celuy de Prestrie, selon la forme du Concile de Trente, & qu'estant ainsi promotez ils puissent deservir au ministration de l'Autel, obtenir & retenir toutes sortes de benefices Ecclesiastiques, pourueu qu'ils ne soient en plus grād nombre qu'il n'est permis par les Decrets dudit Concile de Trente.

ABOLIR & effacer toute nōtte & macule d'inhabilité & infamie, qu'ils pourroient auoir encouruë, & les restablir en l'estat auquel ils estoient auparauant.

ABSOLVRE pareillement en l'vne & l'autre Cour & Iurisdiction, ceux qui auront cōmis Apostasie en leurs Ordres ou Religion, apres qu'ils seront retournez à leur troupeau, ou si la necessité & vtilité le requiert estans trāsferrez en autres Ordres

de pareille ou plus estroite regle, & leur octroyer dispense de l'irregularité pour ce regard par eux encouruë.

ABSOVDRE aussi en l'une & l'autre Jurisdiction de vous mesme, ou par celuy ou ceux, qu'à cest effect il vous plaira deputer, toutes autres personnes de l'un & l'autre sexe, tant Seculieres que Regulieres, de quelque Ordre que ce soit, de tous autres cas reservez en quelque façon que ce soit, tant aux Ordinaires des lieux, que audit S. Siege, & fussent-ils contenuz en la Bulle accoustumee d'estre publiquemēt leuë à Rome le iout du Ieudy Sainct, les absolvant pareillemēt de la sentēce d'excommunication, & autres Censures Ecclesiastiques, qu'ils auroient aucunement encouruës, leur enioignant vne salutaire penitence & autres choses qui eniointes leur deuront estre, excepté toutesfois le cas d'heresie & schisme, & iniectiō de mains violētes sur les personnes des Euesques & autres Prelats superieurs.

DONNER & octroyer licēce & faculté à tous ceux, qui estās en aage legitime & autrement capables se trouueront suffisamment beneficiez, & tellemēt pressez, pour raison des benefices qu'ils tiennent,

que fils attendoient le temps prefix de droit, leurs benefices vaqueroient par leur non promotion, de se faire promouvoir sous le tiltre desdicts benefices, ou mesme, si la necessité & vtilité des Eglises, & des lieux le requiert, sous le tiltre de leur patrimoine, à tous les Ordres, mesme sacrez & de Prestrie, par leur Euesque persistant en l'vnion de foy, & obeyssance du S. Siege Apostolique, ou biē avec ses Lettres dimissoires par quelque autre Euesque Catholique, qu'ils pourront choisir, estant en la grace & communion du mesme S. Siege, & residant hors la Cour de Rome, & en son propre Diocese: Et ce quant aux Ordres sacrez à trois Dimanches, ou trois autres Festes de commandement, hors le temps ordōné de droit, & qu'estant ainsi promeuz ils puissent deservir en iceux, voire au ministere de l'Autel.

ABSOVDRE encore en l'vne & l'autre Iurisdiction toutes personnes, qui sciēment ou ignorammēt auront defaict par cy deuāt contracté mariage, & iceluy cōsumé par cognoissance & accouplement charnel, estant ensemblement coniointes au second & troisieme degré mixte de consanguinité ou affinité, ou biē au trois

ou quatriesme simple, ou trois & quatriesme mixte, du crime d'inceste, de l'excommunication, & autres Censures Ecclesiastiques, & peines par eux à ceste occasion encouruës, leur enioignât toutesfois vne salutaire penitence.

Et leur donner dispense, à ce que notwithstanding l'empeschement du trois ou quatriesme degré simple de cōsanguinité ou affinité, ou du trois & quatriesme mixte, ils puissent librement & licitement demeurer au mariage desia par eux contracté, ou cōtracter & celebrer iceluy de nouveau, en face de S. Eglise, selon le decret dudit Concile de Trente (pourueu toutesfois que les femmes n'ayent esté pour cest effect rauies) decernant & declarant legitime la lignee qui sera ja descenduë dudit mariage, ou qui en pourra descēdre pour l'aduenir, & ce gratuitement & sans aucune recompense, ou present, voire volontairement offert.

DISPENSER aussi toutes autres personnes qui s'attenans ensemblement au quatriesme degré simple ou mixte, voudront neantmoins contracter mariage pour l'aduenir, soit pour ce que le mary, ou autre qui n'y est autremēt obligé veut

doter la fême, qui n'a aucune dot, ou que le mesme mary la veult espouser avec vne dot qui n'est assez compétete: ou si le lieu est de peu d'estéduë, & les parties qui desirét cōtracter, sont Nobles, ou des principaux dudiët lieu: ou bien parce qu'estàs des premiers des Citez, ou Villes insignes ils ne pourroiet trouver autres personnes de pareille condition: ou bien lors que la femme en sō propre territoire, Chasteau, ou autre lieu, ne trouueroit homme qui ne luy fust parent, avec lequel elle se peust honnestement marier, & si elle estoit cōtrainte de se marier autre-part, sa dot ne se trouueroit pour cest effect compétete en biës immeubles. Et aussi pour pacifier & assoupir les inimitiez, qui seroient ja meuës auparauant tel mariage, & pour quelque autre cause, entre les parens, freres, cousins ou alliez des parties, à fin de les remettre en bonne paix & concorde.

DISPENSER pareillement sur l'empeschemēt de la publique honnesteté de Iustice, quant il n'y a eu que les simples siāçailles, nō toutefois malicieusemēt celebrees, & sur la cognatiō spirituelle, apres le mariage cōtracté seulemēt, nō toutes-fois entre celuy ou celle qui est baptisé,

& celuy ou celle qui l'auroiēt tenu sur les fonds de Baptisme, à ce qu'ils puissent de nouveau contracter mariage, & le solemniser en face de S. Eglise, & demeurer en iceluy apres qu'il aura esté ainsi cōtracté.

Et quant à ceux aussi, qui se seroient fouillez & polluz par fornicatiō, ou adultere, pourueu que l'un ou l'autre d'iceux n'ait rien machiné ny attenté contre la vie de la partie deffuncte, quand bien ils auroient consommé le mariage par conuersion charnelle, & en seroit descendu lignee; de les absoudre pareillement de toute coulpe d'inceste & d'excommunication, & de toutes autres Censures Ecclesiastiques par eux à ceste occasion encouruës, en la forme accoustumee en l'Eglise, apres leur auoir enioinct vne salutaire penitence, selon la qualité & grandeur de la faute, & autres choses qui de droict leur pourront estre eniointes: Les dispenser semblablement à ce que, comme dict est, ils puissent de nouveau librement & licitement contracter & solemniser mariage, & demeurer en iceluy; decerner & declarer legitimes les enfans ja descēduz, ou qui pourront descendre de tel mariage.

C O N F E R E R en outre à personnes capables, & pourvoir aux benefices Ecclesiastiques seculiers ayant charge d'ames ou non: cōme aussi aux Reguliers de l'ordre de Clugny, Cisteaux, Premonstré, Grandmont, Fontevraud, & de quelque autre ordre que ce soit, situez seulement & compris dans les limites de vostre Legation, quād bien tels benefices seculiers seroient dignitez, Canoncats & Prebendes, Personats, Administrations, ou Offices és Eglises Cathedrales, Metropolitaines, ou Collegiales, (pourueu qu'icelles dignitez esdites Cathedrales & Metropolitaines ne soient les plus grandes apres la Pōtificale, ou les principales esdites Eglises Collegiales) & fussent encor tels benefices Eglises Parrochiales, ou perpetuelles Vicaries d'icelles. Et quāt aux benefices Reguliers, encores qu'ils soient Prieurez, voire Conuentuels & Electifs, Preuostez, Dignitez, Personats, Administrations & Offices, voire Curez & Electifs, ou du droict de Patronage des laiz (pourueu que ce soit de leur consentement) & autrement comme que ce soit qualifiez, & mesme fussent-ils reseruez ou affectez, specialemēt ou generalemēt,

à la dispositiō Apostolique, pourueu que
legitimement il vous apparaisse, que les
fruiets & reuenuz de chacun d'iceux, selō
la cōmune estimation, n'excede la valeur
de 24. ducats d'or de Nostre Chābre par
chacun an, qui vacqueront hors nostre
Cour, dans les limites de ladite Legatiō,
Prouinces & lieux d'icelle auparauāt qu'ē
soyez fortý seulement, par mort ou par
quelque autre maniere que ce soit (non
toutesfois par resignation) & par le moyē
de quelques personnes que ce puisse estre,
Pourueu que ceux qui vacqueront par
mort, ne soient reseruez & affectez à no-
strediēte dispositiō, à raison que ceux qui
les tenoient, estoient noz domestiques, &
ordinaires Commeniaux, ou de quelque
Cardinal viuant.

POVR VOIR d'Abbez, Abbeses, ou
autres Prelats, aux Monasteres de ladiēte
Legation, tāt d'hommes que de femmes,
de quelque ordre qu'ils puissent estre, des-
quels toutesfois les fruiers & reuenuz n'ex-
cedent la valeur de 24. ducats, selon la
commune estimation, par chacun an, cō-
me diēt est.

DONNER en Commande aux per-
sonnes Seculieres, les Monasteres & au-

22

tres Benefices Reguliers susdicts (nō toutesfois Consistoriaux n'y excedans par chacun an la valeur ja specificee) qui ont accoustumé d'estre tenuz en Commāde, ou pour le moins qui vaquent cessant à lors les Commandes, qui auparauant en auoient esté faictes à vie, pour estre iceux par lesdicts Seculiers tenuz, regis & gouuernez, en sorte qu'il leur soit loisible, apres auoir satisfaiēt à toutes les charges deües & accoustumees, de disposer & ordonner du reste des fruits, profits & reuenuz d'iceux, tout ainsi que les Titulaires, durant leur temps en pouuoient ou deuoient disposer, leur estant neantmoins entierement defendu de n'aliener aucune chose des immeubles, ny des meubles precieux desdicts Monasteres & Benefices Reguliers, qui seront ainsi dōnez en Commande.

APPROVER & confirmer tous Cōcordats licites & honnestes à la requeste des parties, Suppleer tous & chacuns les defaux de droict & de faict, si aucuns y en a, & ordonner qu'ils seront d'un chacun entretenuz de poinct en poinct.

ERIGER & instituer en toutes Eglises Cathedrales, Metropolitaines, & Col-

legiales, Chanoines & Prebendes, Dignitez, Personats, Administrations: Instituer aussi des Monasteres, tant d'hommes que de femmes, de quelque ordre que ce soit: Bref tous Benefices Ecclesiastiques avec Cure & sans Cure, Seculiers & Reguliers, & qualifiez comme dict est, avec toutes les Jurisdiccions & marques accoustumees: Et voire avec ceste clause, qu'ils ne puissent iamais estre erigez en til tre de simple & perpetuel Benefice Ecclesiastique.

INSTITVER aussi & eriger Hospitaux, Confrairies, & autres lieux pies & Religieux, leur assigner, appliquer & approprier pour iamais biens competents pour leur dotation.

RESERVER & cōceder droict de Patronage & Presentation à l'Ordinaire du lieu de personnes capables pour cause de fondation & dotation seulement, esdicts Benefices ainsi par vous erigez: Et faire tous Statuts & Ordonnances licites & honnestes, & non repugnâtes aux saincts Canons & Decrets du Concile de Trente.

DONNER congé aux Chanoines des Eglises Cathedrales, Metropolitaines &

Collegiales, & à ceux qui sont pourueuz en icelles de Dignitez, Personats, Administratiōs, Offices, & autres Benefices Ecclesiastiques, pourueu toutesfois qu'ils n'ayent charge d'ames, & que lesdicts Beneficiers n'ayent encore atteint l'aage de trente ans, à ce que residans aux Vniuersitez, où se faict profession des Lettres, & y estudians actuellement, ils puissent percevoir tous les fruićts, profits & reuenuz de leurs Chanoinies & Prebēdes, Dignitez, Personats, Administrations, Offices, & autres Benefices susdicts par l'espace de deux anneés seulement, tout ainsi & si entierement (horsmis les quotidiennes distributions) qu'ils les pourroient percevoir s'ils y estoient presents & residents, en sorte que pendant ledict temps ils ne soient tenuz de faire residēce en leursdits Benefices. A la charge toutesfois que dās la premiere desdites deux anneés, ils ayēt à prédre à tout le moins l'Ordre de Souf-diacre, si tant est qu'à l'occasion de leurs Benefices, ils soiēt tenuz de se faire promouvoir és Ordres sacrez, ou à quelqu'un d'iceux. Aussi leur permettre qu'ils puissent librement & licitement estudier aux Loix, & droict Ciuil, voire és Vniuersitez pendant

pendant lesdictes deux années, demeurer en icelles & y receuoir tous les degrez d'icelle faculté.

ET à fin que les personnes de vertu & merite soient ornees de quelque plus honorable tiltre & qualité, Nous vous donnōs faculté & pouuoir de creer, receuoir & instituer Prothonotaires ou Accolytes & Chappelains de Nous & du S. Siege, Ceux de Clericature que verrez estre recommandables, soit par leur Noblesse, soit par leur grade & doctrine, ou par leur loüable maniere de viure, & ce iusques au nombre de douze seulement, ayant au prealable receu d'eux le serment accoustumé, & saufs les Decrets dudiect Coucile de Trente, touchant l'exemption abolie par iceux.

CREER pareillement d'entre les personnes Laïques, iusques au nombre seulement de douze Comtes du Palais & de Nostre Court de Lateran, ou Cheualiers de l'Esperon d'or, avec les marques & enseignes deües & accoustumees, en faisant par eux profession de foy selon la forme prescrite par lediect S. Siege, & sans la Faculté de dispenser sur l'illegitimité ou bastardise, à l'effect de succeder, receuoir les

D

saincts Ordres & Benefices.

C R E E R aussi des Notaires & Tabel-
liōs publiques, iusques à tel nombre que
bō vous semblera, ayant semblablement
receu d'eux le serment accoustumé.

E T agreger fauorablement les sus-nō-
mez au nombre & compagnie de noz au-
tres Prorhonotaires, Accolytes ou Chap-
pelains, Comtes ou Cheualiers & Tabel-
liōs susdicts, à ce qu'iceux & les Protho-
notaires mesmes, quoy qu'ils ne portent
l'habit & le roquet, puissent neantmoins
vser & iouyr de tous & chacuns les priui-
leges, hōneurs, prerogatiues, faueurs, gra-
ces & indults octroyez aux autres Pro-
thonotaires qui sont du nombre des par-
ticipans, & aux Comtes & Cheualiers,
sans preiudicier toutesfois esdicts Pro-
thonotaires, qui sont du nombre des par-
ticipans.

O C T R O Y E R faculté à toutes per-
sonnes de l'un & l'autre sexe Ecclesiasti-
ques & Laiz, qui se pourroient trouuer es
lieux, qui ont esté mis en Interdict Eccle-
siastique de l'autorité Apostolique, d'y
pouuoir licitement celebrer & faire cele-
brer la Messe, en leur presence & de leurs
domestiques & familiers, pourueu qu'ils

ne soiēt cause de tel Interdict, ou ne soiēt eux-mesme specialemēt Interdicts, moyennant que les portes soient fermees, & que celà se face sans sonner les Cloches, & apres en auoir mis hors les Interdicts & excommuniez.

OCTROYER finalement pour vne seule fois misericordieusement en Nostre Seigneur, Indulgence pleniere & remissio de tous leurs pechez à tous fideles Chrestiens & Chrestiennes, qui estant vrayement penitents & confez, & ayant receu la sacree Cōmunion, visiteront quelconques Eglises ou Chappelles, seculieres ou Regulieres, en vne certaine Feste seulement, à commencer dès les premieres Vespres, iusques à Soleil couchant de la dite Feste, & prierōt Dieu en icelles pour l'vniō & concorde des Princes, extirpation des heresies & exaltation de nostre saincte Mere l'Eglise.

RELASCHER aussi & remettre en la forme accoustumee en l'Eglise, ausdicts fideles Chrestiens & Chrestiennes, vrayement penitents & confez, ou ayant ferme propos de se confesser, qui visiteront lesdictes Eglises ou Chappelles à certain iour & Feste, ou Dimanche, vne fois seu-

lement par chacun an, & y prieront Dieu comme dessus, pour chasque fois qu'ils effectueront celà, dix ans & autāt de quarantaines des penitēces à eux enioinctes, ou qu'à bon droict leur auroient peu estre enioinctes, ou ausquelles ils seroient autrement tenuz en quelque maniere que ce soit: En sorte toutesfois que telle relaxation se face vne fois seulement l'annee pour chacune Eglise ou Chappelle, & ne puisse durer d'auantage que pour cinq ans.

CHANGER & commuer en autres œuures pies, toutes sortes de vœuz d'outre-mer, visitation de l'Eglise des bienheureux Apostres S. Pierre & S. Paul de Rome, & de saint Iaques en Gallice, exceptez seulement les vœuz de chasteté & de Religion.

OCTROYER faculté à toutes personnes Ecclesiastiques & Prelats, de pouuoir librement & licitement tester & disposer des biens & choses Ecclesiastiques, selon la forme portee par le Quinterne de la Chancellerie Apostolique, & iusques à la somme y descripte.

ET à fin que les permissions, graces & Lettres, qui par vous seront octroyees, en

vertu de ces presentes, sortent leur plain effect, tous empeschemens cessans: Nous vous donnons plein & libre pouuoir, de l'autorité Apostolique, par la teneur de ces presentes, d'absoudre toutes personnes, de toutes & quelconques sentences d'excommunication, suspension, interdict & autres Censures & peines Ecclesiastiques, de faict ou de droict, pour quelque occasion que ce soit, à l'encontre d'iceux ordonnees, si d'aventure ils s'y trouuoient pour lors aucunement liez & astraincts, pourueu qu'ils n'ayent demeuré en telle ordure par l'espace d'un an: decerner & declarer iceux absouz, & ce seulement à l'effect d'obtenir les choses cy deuant mentionnees.

DELEGVER & commettre en vostre place des Iuges, Assesseurs, Commissaires, & Executeurs, sur le tout ou partie de ce que dessus, & pour faire executer & obseruer celà mesme & les Lettres, qui en seront par vous expediees.

DECRETER commandemens, prohibitiōs, & monitoires, mesmes sous les Censures & peines susdictes, & autres remedes que bon vous semblera, nonobstant appellations quelconques: faire,

decreter, & executer, voire par vn autre ou plusieurs, de l'autorité Apostolique, toutes & chacunes choses aucunement opportunes & necessaires à tout ce que dessus, & qui le concerneront en aucune maniere.

ORDONNANS que vous puissiez librement & licitement vser de toutes les susdictes Facultez & permissions, mesme avec les derogations, suspensions, indults annullans, & autres decrets & clauses necessaires & opportunes, & qui ont accoustumé d'estre inferrees & mises au long dās les Lettres Apostoliques, & ce tandis que vous demeurerez audit Royaume, & aussi en vous en retournāt (excepté la Faculté de conferer Benefices, & de donner licence de tester des biens Ecclesiastiques) en tous endroits, Royaumes, Prouinces, Villes, Citez & autres lieux, & à l'endroit des habitans d'iceux, ou mesme des estrāgers, qui aurōt recours à vous, de quelque part que ce soit, comme aussi enuers voz familiers & domestiques.

ET qu'on adioustee pleine foy & obeïssance aux permissions, prouisions, & autres dispositions mesme de Benefices, & autres graces que vous ferez en vertu de ces

presentes, & de vostre Legation, à vostre seule narratiue, Concessions & Lettres, sans autre insertion ou exhibition des presentes, interuention d'aucun Notaire ou tesmoins, & sans qu'il soit requis en celà aucun renfort d'autre preuue: Et qu'ainsi doieue estre iugé & definy, en quel que cause & instance que ce soit, par tous Iuges ordinaires & deleguez, voire Auditeurs des Causes du Palais Apostolique, & Cardinaux de la S. Eglise Romaine, leur ostant & à chacun d'eux toute puissance & authotité d'autrement iuger, interpreter, & declarans inualide & de nul effect, tout ce qui pour ce regard pourroit estre attenté au contraire sciemment ou ignoramment, par quelque personne, & de quelque auctorité que ce puisse estre.

NONOBTANT les defectuositez & autres choses susdictes, & les Lettres mentionnees, qui ont accoustumé d'estre leües le iour du Ieudy Sainct, & autres Constitutions & Ordonnances Apostoliques, & celles principalement, par lesquelles la Faculté d'absoudre en certains cas y specifiez, est si specialement reseruee au Pô-tife Romain qui est pour lors, que semblables ou dissemblables concessions de

Facultez d'absoudre, & dispenser, rehabi-
liter & abolir, ne peuuent seruir ny auoir
aucun effect, sil n'est faict expresse men-
tion, ou speciale derogation des Consti-
tutions susdictes: Nonobstant aussi les
Constitutions & Ordonnances de tous
Conciles, voire Generaux, Prouinciaux,
& Synodaux & du Pape d'heureuse me-
moire Boniface VIII. nostre predeces-
seur touchant vne diette, & du Concile
general touchant deux diettes, & autres
quelcōques Cōstitutions Apostoliques,
generales ou speciales, faictes & promul-
guees aux Conciles Prouinciaux & Sy-
nodaux. & nonobstāt les regles de Chā-
cellerie Apostolique, sans aucune en ex-
cepter, & lesquelles pourront en chacune
chose separément estre exprimees & esté-
dues: Les Statuts pareillement, & Cou-
stumes des Eglises, Monasteres & Ordres,
voire de Clugny, Cisteaux, Premonstré,
Grandmont, Fontevraud, & des Cōgre-
gations ou Institutions: des Chapistres,
Conuēts & Vniuersitez, Colleges, Citez
& lieux quelcōques, fortifiez par sermēt,
confirmation Apostolique ou autre au-
thorité: Encores que les personnes des-
dicts lieux ayent faict serment ou le puis-
sent

sent faire cy apres, de garder & obseruer
 tels Statuts, & de n'impetrer aucunes Let-
 tres Apostoliques au contraire, de n'vser
 d'icelles où il se trouueroit qu'aucuns au-
 tres les eussent impetrées, ou qu'elles eus-
 sent esté autrement en quelque maniere
 que ce soit octroyees: Nonobstant aussi
 tous priuileges, & indults Apostoliques,
 generaux & speciaux, octroyez ausdictes
 personnes à leurs Superieurs & Conuerts,
 & toutes les autres choses, qui autrement
 pourroient en aucune maniere, empescher
 l'effect de tout ce que dessus, desquelles
 nous ne voulons qu'aucun se puisse pre-
 ualoir pour ce regard en aucune maniere:
 Ains que vous puissiez deroger à toutes
 les choses susdictes & autres contraires à
 icelles, ainsi & comme il sera expedient
 selon l'exigence de la chose & des cas, en
 general ou special, tant coniointement
 que separement ainsi que bon vous sem-
 blera. Et nonobstant que quelques vns
 es lieux susdicts eussent impetré dudict
 S. Siege ou de ses Legats Lettres specia-
 les ou generales touchant les prouisions
 ou Commandes par eux pretendues de
 semblables ou autres Benefices, encore
 qu'en vertu d'icelles eust esté procedé iuf-

ques à l'inhibition, reservation & decret, ou autrement en quelque maniere que ce soit, voulans qu'à ceux-là soient preferez en l'obtention desdits Benefices, ceux en la faueur desquels il en sera par vous pourueu ou autrement disposé, sans que celà leur cause aucun preiudice en l'obtentio d'autres Benefices: Où si le mesme S. Siege auoit octroyé Indult conioinctement ou separemēt aux Ordinaires Collateurs des lieux, aux personnes sus-nommées & autres quelconques, à ce qu'ils ne soient tenuz de receuoir ou pouruoir aucun, & qu'à ce ils ne puissent estre contraincts, ny interdicts, suspenduz, ou excommuniez. Et que de tels, ou autres Benefices Ecclesiastiques appartenans conioinctement ou separemēt à leur collation, prouision, presentation, election ou autre dispositio, nul ne puisse estre pourueu, ou les obtenir en Commande par Lettres Apostoliques ne faisant mention pleine, expresse, & de mot à mot, de tel Indult, ou autre quelconque octroy dudit S. Siege general ou special de quelque teneur qu'il puisse estre; au moyen duquel pour n'estre exprimé, ou nullement inseré en ces presentes, & aux Lettres, qui en vertu d'icelles

seront par vous octroyees l'effect d'icelles pourroit estre empesché ou differé en aucune maniere, & duquel deut estre faite speciale mention esdictes Lettres & de tout le contenu en iceluy.

V O U L O N S en outre qu'il soit donné telle & si entiere foy, en iugement & hors d'iceluy, en tous lieux à la coppie des presentes, voire imprimee, soubscripte de la main & seing du Regent de vostre Chancellerie ou Secretaire, & scellée de vostre Seel, laquelle seroit adioustee à ces presentes mesmes, si elles estoient monstrees & exhibees.

D O N N E' à Rome, au Palais de saint Pierre, l'an del'Incarnation de nostre Seigneur, mil cinq cens nonante deux, le quinziemesme d'Auril, & l'An premier de nostre Pontificat.

Signé, *G. Bastonus Prodatarius.*

M. Vestrius Barbianus.

Et sur le reply. *A. de Alexiis.*

Et au dos. *Registrata apud Marcellum Secretarium.* Et scellée d'une Bulle de plomb pendante à une cordelette de chanure.

Registrées, ouy, & ce consentant le Procureur general du Roy, pour en user par ledict sieur Cardinal de Plaisance, selon & ainsi qu'il est contenu en icelles, sans preiudice toutesfois des auctorité & Jurisdiction Royale & liberté de l'Eglise Gallicane. A Paris, en Parlement le 27. iour d'Octobre, l'An 1592.

Signé,

DV-TILLET.

Extraict du priuilege.

PA R priuilege donné & octroyé, par Messieurs du Conseil general de la saincte Vnion des Catholiques, A Rolin Thierry Imprimeur, Il luy est permis d'imprimer tout ce qui peult concerner l'Estat public & affaires de France, & qui sera ordonné & procedera d'iceluy Conseil. Et sont faictes defences à tous autres Libraires & Imprimeurs, de les imprimer ou faire imprimer, ny exposer en vente, sur peine de confiscatiō des exemplaires, & d'amende extraordinaire, ainsi que plus à plein est contenu par ledict Priuilege. Donnée à Paris le 18. Aupil, 1589.

Signé,

SENAVLT.

